

**“NATUNGPALEN”- Juan 19:30**  
(Maikanem a balikas ni Jesus idiay krus)

**PAKAUNA**

Sallukobann tayo koma ti ayat ken pannakabalin ni Apo Dios ay-ayaten a kakabsat ken Cristo. Maiyadayotayo koma ti allawig ken gita ni COVID 19 ita nga aldaw nga sangsangkamaysatayo nga mang-observa ti Biernes Santo. Kas intayo agdaydayaw ti Dios, first time a pasamak daytoy kadatayo a set-up, pisikal a saantayo nga agkadmakadwa ngem mamati-ak a dagitoy a pamuspusan tayo dakkel ti kaimudinganna iti Dios a pagrukrukbaban ayo..

**TEKSTO/MENSAHE**

Intayo ngarud warwaren ita dagiti kapanunotantayo iti daytoy maikanem a balikas ni Apo Jesu idiay krus a kunana a sipupukkaw, “NATUNGPALEN.” Wen kakabsat silalaaw nga imsbalikas ni Apo Jesu daytoy, saanna nga inyarasaas...ipakitana ti sibabaligi a panangabak kenni patay ken pannakipatungpalna ti Missionna ditoy rabaw ti daga.

Daytoy balikas ni Apo Jesus ay-ayaten a kakabsat ket irukuasna ti adu a saludsod ti panunottayo, kas kadagiti sumaganad: Ania ngay diay natungpalen wenno nalpasen? Ania aya ngata ti immayan ni Apo Jesus idi immay nakipagnaed ditoy lubong dagiti mortal? Ania dagiti misionna a sibabaligi nga impukawna a nalpasen wenno natungpalen? Wen kakabsat dagitoy a saludsod ti intay pangrugian.

Apay nga immay ni Apo Jesus nagnaed kadatayo? Ania ti mision nga immayanna? Ti Nasantoan a Surat sinungbatanna dagitoy kadagiti nadumaduma a bersikulo maipanggep ti immayan ni Apo Jesus ditoy lubong dagiti mortal. Ipakaawat ti Biblia dagitoy sumaganad a bersikulo maipanggep ti mision ni Cristo; **Umuna**, PANANGIWARAGAWAG TI NAIMBAG A DAMAG KADAGITI NAPANGLAW (Lucas 4:18-19). **Maikadwa**, PANNAKAIPAAY TI BIAG (Lucas 4:43). **Maikatlo** PANANGLAPPED KADAGITI KINADAKES ( Lucas 12:49). **Maikapat**, PANAGSAKSI TI KINAPUDNO (Juan 18:39) ken **Maikalima**, PANNAKASUBBOT DAGITI TATTAO MANIPUD BASOL (Mark 10:45).

Daytoy a mision ni Apo Jesus a naipatungpalna ket isu met ti mision nga inarakup ti Iglesia nga ipatungpalna met a sibabaligi ti agdama a panawen ken kasasaad ti lubong. Ket daytoy a kasasaadtayo ti agdama kas panangsangotayo ti daytoy COVID 19-pandemic ket mai-“relate” la unay no sublianantayo dagiti naidayday a mision ni Cristo kas armas ti panangsaranget daytoy makapatay a virus. Awagannatayo a mangipaay ti biag dagiti tattao, kayatna a saoen ti panangibingay ti adda kadatayo kadagiti napanglaw, nakakaasi, vulnerables a kakabsattayo kas paset ti intayo pannangiwaragawg ti naimbag a damag. Kasapulanda ti tulong ti Iglesia ken tulongtayo a namati. Mainayon ti kasapulan ken awag ti agdama a panawen isu ti pamnanglapped kadagiti aramid a dakes, uray pay daytoy kastoy a kasasaad ti sangalubongan aramaten pay laeng dagitoy nga adda ti turay para iti panangitan ok kadagiti bagbagida ket ti napait a panunoten nga usarenda a pagpulitika ken dadduma nga saan a karurusok nga aramid iti inda ipakpakat aglalo ti pannakaibunong dagiti Relief Goods ken sumaruno dagiti ayuda a Cash. Wen, ti awag kadatayo ket pananglapped kadagitoy a dakes nga ugali babaen ti panagtimek ken panangkondenar tayo

agraman ti panagsaksi tayo ti kinapudno. Numanpay dagitoy nga inaramid ni Apo Jesus isu ti mitsa ti nakas-ang nga ipapatayna. Tumakder tayo ngarud kas naikatalkan ti mission ni Cristo iti daytoy agdama a sasaaden ti lubong dagiti mortal. Masapul a nakasagana tayo met iti kastoy a mapagteng ta uray dagiti frontliners nakasaganada nga nangipaay ken mangipapaay ti biagda tapno agbiag ti kaadduan.

Daytoy pay a balikas ni Apo Jesus “Natungpalen” ibuksilanna pay kadatayo kas indibidwal ken kas Iglesia dagiti sumaganad nga adal ti biag kas ni Apo Jesus ti pagwadantayo:

**1. Panangibiag ti biag nga addaan ti panggep wenno purpose**

Ni Apo Jesus addaan ti nalawag a PANGGEP ti iyuumay pannakipagbiag kadatayo, nalawag ti mision nga inyumayna impatungpal ket nasinunoo na dagitoy ket NATUNGPALEN babaen iti panangawat ti kopa ti panagsagaba. Ket ti biagtayo a namati ken ti biag ti Iglesia daytoy awag kadatayo ti pananngbukel ti maymaysa a panggep ti panangserbi ken pannakaipatungpal toy inawattayo a mision ni Cristo, nalawag koma ti maymaysa panggep ti intay panagdaliasat ken panangserbi iti daytoy agngangabit ken patay a lubongtayo.

**2. Panangibiag ti biag nga addaan ti pokus**

Karaman ti kinaadda ti nalawag a panggep isu ti biag nga addaan POKUS ti ayab ti panangserbi, awan sabali a Pokus ti panangserbi no di ti panggep ken mision ni Apotayo a Jesu-Cristo, ta no taliwas dayta pokus ken panggep saantayo a magun-odan ti talna ken ayat ni Cristo. Ti panangserbi masapul a naipokus ti ayat ken Compassion tapno saan a dahas ti mausar nga igam ket saan nga rumsua ti riribuk. “Bigas hindi dahas”.

**3. Panangibiag ti biag nga addaan panagtulnog**

Iti daytoy a pakinakem nga adda ken Cristo nga Apo isu daytoy nangitan-okan ti Ama kenkuana. Saan a nagkitakit uray napasamak kenkuana iti kadadaksan a klase ti pannakatay ngem nagtulnog a sipapakumbaba iti nangibaon kenkuana isut’ gapuna iti panangipukkawna ti balikas a “Natungpalen” addaan isuna ti pannakapnek kadagiti trabaho a naipabaklay kenkuana. Iti panagtulnogtayo aglalo daytoy mapspasamak a didigra iti biag ti sangalubongan kasapulanna ti panagtulnog kadgiti alagaden nangruna iti awag dagiti Medical practitioners maipanggep ti Enhanced Community Quarantine (ECQ). Karaman pay ditoy ti panagtulnogtayo ti awag ti intayo panangipaay ti tulong arayat wenno saranay kadagiti kapammatian, kakabsat nga agkasapulan..Wen, daytoy ti awag kaniatayo met ita kakabsat ta adu dagiti agrigat ken agbisin ket agtulnog tayo kadi a kas annak ni Cristo.

**4. Panangibiag ti biag nga addaan panagsakripisio tapno magun-odan ti panggep ti Dios**

Kasapulantayo ti sakripisio ti amin nga aramid ken panggeptayo ita a panawen ti COVID 19. Uray ti panagdaydayawtayo kasapulantayo nga agsakripisio saan laeng kadi a dagiti bagbagitayo ti kitaentayo, kangrunaan dagiti agkasapulan ti ayattayo. No dua ta tinapaymo ibingay mo kadi ta maysa kenni kabsatmo? Ti daytoy a tiempo kasapulan ti nalawa a sakripisio, panunotentayo a saan laeng a datayo ti agbiagi ditoy lubong. Adu dagiti pakdaar aggapu kadagiti maseknan a masapul a tungpalen, adda met dagiti maipakpakat a saan a nalinteg a panagtrato tubngarentayo isakripisotayo uray ti biagtayo kas kenni Apo Jesus ket tapno magun-odan tayo ti panggep ti Dios.

**PAKAGUPGOPAN:**

Iti pukkaw ni Apotayo a Jesu-Cristo ket rikna ken pannakaamiris ti maysa a tao a dagiti trabaho ken mision a nalawag ken addaan pokus karaman ti panagtulnog ken sakripsio masinunoo daytoy a naballigi a naipatungpal wenno naiyaramidna..mamatiak a daytoy a balikas kasangwanan nga inyawat ti Dios ti kararuana iti Ama a nangibaon kenkuana ket maseguradona nga awan ti makuna ti panangibiagna...Kadatayo ngarud nangiyawatan ni Apo Jesu daytoy a Panggep ken Mision nga immayanna ket situtulnogtayo met mangitrabaho para ti pakaitan-okan a mismo iti Dios a nangayab kadatayo. Nalawag ken addaan pokus a panagserbi iti Dios karaman ti panagtulnog ken sakripisiotayo. No maadda ken maipatungpal dagitoy iti biagtayo..kumatayon met nga ipukkaw ti sangwanan dagiti tattao a kontra ken umanamong kadatayo.. It is "FINISHED," "Natungpalen." Iti Nagan ti Dios Ama, Anak ken Espiritu Santo Amen..